

# INUIT ATAQATIGIIT

## INATSISARTUNI



UPA 14/151  
20. maj 2014  
Naaja H. Nathanielsen

**Danmarkip Aarhusimi isumaqatigiisummik (innuttaasut avatangiisit pillugit paasissutissanik pissarsisinnaaneranut, avatangiisinut suliassaqarfimmi aalajangiinernut peqataasinnaaneranut aammalu maalaaruteqarsinnaaneranut eqqartuussivitsigullu misiliisinnaaneranut tunngasumik) akuersinerani Kalaallit Nunaannut tunuarsimaarfiginninnerup atorunnaarsinneqarnissaanik sulissuteqaqqullugit, aammalu aalajangiiffigisassatut siunnersuutip matuma akuerineqarnerata kingunitsiannua sulineq tamanna aallartinneqaqqullugu Naalakkersuisut peqqunneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Sara Olsvig, Inuit Ataqatigiit)

Inuit Ataqatigiit siunnersuuteqartoq, Sara Johanne Olsvig, qujassuteqarfigaat, avatangiisinut tunngasuni innuttaasut akuutinnissaat maalaarnissamullu periarfissaat pillugit oqallinnissamut periarfissimmatigut.

Demokratii ingerlalluassappat innuttaasut pisortat aalajangiinerinik tatiginnissinnaanissaat pinngitsoorneqarsinnaanngilaq. Aamma isumaqataaangikkaanni pisortat aalajangiineri pillugit maalaarnissamut periarfissaqarnissaq. Uani pingaartuuvoq eqqaamassallugu maalaarnissamut periarfissaqarnerup qularnaangimmagu maalaarutaasumik ilalerneqarnissaq. Kisianni inatsisinik tunngaveqartutut misiginissamut pingaartuuvoq isumaqataaanginnerup nalunaarutiginnissanut periarfissaqarnissaq.

Qinigaaffimmi kingullermi aatsitassat pillugit inatsimmi aamma avatangiisit pillugit inatsimmi nutaami maalaarnissamut periarfissaq ilanngupparput. Aamma Inatsisartut aatsitassat pillugit inatsimmi tusarniaanissamut innuttaasunillu peqataatitsinissamut piumasaaqatit erseqqissaqammivaat. Taakku tamarmik tassaapput suliniutit pitsaasut, Inatsisartut isumaqatigiillutik tapersigaat.

Ilutigisaanilli nassuerutigisariaqarparput pitsanngorsaanissamut suli inissaqarmat. Tassami aatsitassat pillugit inatsit taamaallaat aatsitassarsiornermi sulianut tunngasuuvoq. Aatsitassallu pillugit inatsimmi aalajangersakkat avatangiisit pillugit inatsimmi aalajangersakkat qulangersimallugit. Aamma akuttunngitsumik tusartarparput NGO-t tusa-gassiiviillu paasissutissanik assigiinngitsunik piniarnerminni pisortanit assut akimmiffisaaqartinneqartartut.

Naalakkersuisut siunnersuut itigartippaat, Aarhusimi isumaqatigiisummi siunertarineqartut pingaarnert avatangiisit pillugit inatsimmut atuuttumut ilanngunneqareermata. Tamanna qujanarpoq. Kisianni Naalakkersuisut akinngilaat, Aarhusimi isumaqatigiissutip ilai suut suli inatsisinut ilanngunneqaanginnerusut, aamma sooq aalajangersakkat taakku toqqarneqarsimanginnerusut. Siunnersuuteqartup tamannarpiaq siunnersuuteqarnermini nammeneq ujartuiffigialuarpaa.

Taamaammat iluarisimaarnarpoq Naalakkersuisut Aarhus Universitet qinnuigisimammassuk paasiniaqqullugu isumaqatigiissutip ilai suut, inatsisinut atuuttunut ilaareernersut suullu ilaanginnerusut.

Matumanimi tamatta assigiinnik anguniagaqarunarpugut – tassalu inuiaqatigiinni innuttaasunik peqataatitsinermut, ilisimasanik avitseqatigiinermut maalaarfissaqarnissamullu pit-

saasunik malittarisassaqaarnissap qularnaarnissaa. Aamma siunnersuutip kinguneriumaagai takujuminaassimappata. Taamaamat Inuit Aaqatigiit allannguutissatut siunnersuut una saqqummiuppaat:

**2014 naatinagu Aarhusimi Isumaqatigiissutip misissuiffigineqarnissaanik Naalakkersuisut peqquneqaqqullugit Inatsisartut aalajangiinissaannik siunnersuut. Misissuinermi erseqqissumik aallaaserineqassaaq, aalajangersakkat suut inatsisinut atuuttunut ilanngunneqareersimanersut, suullu ilanngunneqarsimannginnersut. Innuttaasut periarfissaat pisinnaatitaaffiilu aallaavigalugit ilutigisaanik aamma misissuinermi allaaserineqassapput isumaqatigiissutip akuerinerata iluaqutissartai ajoqutissartaalu aammalu allaffissornikkut aningaasaqarnikkullu kingunerisassai.**

Inuit Aaqatigiit neriutigaat Inatsisartuni amerlanerussuteqartut akuerissagaat, innuttaasut aalajangeqataasarnissaat maalaaruteqarsinnaanerallu pillugit erseqqissunik malittarisassaqaarnissaq pisariaqartinneqartoq. Taamatut oqaaseqarluta siunnersuut Inatsisinut Ataatsimiititaliami suliassatut ingerlatipparput.